

- Urent et frangent, formidine precipitabunt.
 Quid plus? nemo valet tormenta referre furoris,
 Quę malus ordo feret miseri sine fine doloris.
- 325 Ecce patet iustos paradiscolas comitari,
 Et patet iniustos herebi stimulo cruciari.
 Sed tamen ad partem non tendo miser meliorem,
 Nam gerit ad partem me mundus deteriolem.
 Ergo libet mundo me pauca referre superbo,
- 330 Illecebris cuius sum vulnere lesus acerbo.
 Respondeto michi tu, qui mundus vocitaris,
 Qui locus immundus potiori iure vocaris:
 Quare demonstras tot munera divitiarum,
 Quas causas rerum tu iactas esse bonarum?
- 335 Irrationalis tua si natura creatur,
 Cur rationalis per te natura novatur?
 Tu sibi das aurum, gemmas sibi das preciosas,
 Tu dominaris ei dando vestes speciosas.
 Cur non abscondis fovea, mala pestis, in ima,
- 340 Que michi demonstras pro forma laudis opima?
 Dignior est mea forma tua: frustra dominaris,
 Semper eris sub me, si mente mea reprobaris.
 Vilis es, et tua res et olens et vilis habetur,
 Plus hodierna nocens quam res hesternum videtur.
- 345 Que michi largiris, me fallunt suscipientem,
 Me quia non faciunt existere sufficientem¹.
 Ergo fallax es, tua² sunt fallacia dona,
 A quibus efficitur non alba sed atra corona.
 'Nunc, homo, sufficiunt convicia; queso sileto,
- 350 Queso parumper, homo, me respondere iubeto.
 Mundus ego dicor, sed tu nomen variasti,
 Immundum quoniam me velle tuo vocitasti.
 Immundus non sum, sed si sum, testor aperte,
 Quod vox hec quod fert a te processit inerte.
- 355 Monstro divitias, et tu quare capis illas,
 Curque meas urbes, cur diligis, obsecro, villas?
 Nec reprobo rerum, nec laudo dona mearum,
 Sed mea tu dicis rerum decus esse bonarum.
 Irrationalem scio me natura creavit,
- 360 Et rationalis me talem cur adamavit?
 Auri flavus honor, gemmarum splendor amicus,
 Vestitusque color, candore ruboreque plenus,
 A latebris sub rupe meis si forte tegantur,
 A te queruntur violenter ut inveniantur.
- 365 Confiteor: deberer ego sub te retineri,
 Sed quem miraris debet tuus auctor haberi.

1) Cod. Rem. f. 175 v. 2) 'et tua' Clar.